


## ALAHADY SAMPANKAZO - TAONA B



***Tsy nafeniko tamin'ireo nandatsa Ahy ny tavako,  
ary fantatro fa tsy ho menatra Aho.***

Ry Kristianina havana, hatramin'ny nanombohan'ny karemy no nanomana ny fontsika tamin'ny ezaka maro samihafa isika ho fanoherana ny ratsy mba hanaovana ny soa misimisy kokoa. Ady sady Dia no nametrahantsika ny làlana nianantsika an'izao karemy izao. “Ady” amin'ny ratsy rehetra izay mampisaraka antsika amin'Andriamanitra dia ny fanapotohana, ny famonoana, na amin'ny teny ataontsika amin'ny mpiara-belona aza izany na amin'ny eritreridrantsintsika, na amin'ny adidy tsy vitantsika. “Dia” mankany

amin'ny fiainana miaraka amin'i Kristy raha mamakivaky ny fiainana miaraka aminy isika ka miaramaty Aminy amin'ny fahotana dia hiara-hitsangana Aminy koa miditra amin'ny fiainam-baovao.

Amin'izao Alahady sampankazo izao dia miara-miditra

amin'i Jesoa ao Jerosalema isika, Jerosalema tanàna masina, tanànan'ny fahandriam-pahalemana, tanànan'ny fiadanana. Isika koa miara-miditra amin'i Jesoa isika ankehitriny mba hiombona aminy koa amin'ny fijaliana ka amin'izay manantena ny hiara-hitsangana aminy koa. Izany ny misterin'ny Paka ankalazaintsika.

Mankalaza ny nijalian'i Jesoa isika ka mankalaza koa ny fitsanganany velona amin'ny Paka. Paka fandalovana passage.

Vakiteny I : Iz. 50, 4-7

Tononkira : Salamo 21

Vakiteny II : Fi1. 2, 6-11

Evanjely : Mk.14, 1 – 15, 47

Nobanjinintsika izany fijalian'i Jesoa izany isaky ny nanao ny làlan'ny hazo fijaliana isika fa indrindra tamin'ny niarantsika nanao ny pelerinajy teny amin'ny "montagne de français". Ka amin'izao Alahady sampankazo izao dia miara-miditra amin'ny herinandro masina isika handinika bebe kokoa ny fitiavan'Andriamanitra, ny famindrampont'Andriamanitra.

Ny herinandro masina tsy hoe fibanjinana ny fijalian'i Kristy fa fibanjinana ny fitiavan'Andriamanitra amin'ny alalan'ny fijalian'i Jesoa kristy ho antsika izay mampibaribary ny fahatanterahan'ny famonjena antsika. I Jesoa izay nanolotra ny tenany ary maty ho antsika. Isan-taona isika no manatanteraka izany fibanjinana ny fitiavana amin'ny alalan'ny fahafoizantenan'i Kristy izany kanefa tsarovy ry Kristianina havana fa tsy hoe mahatsiaro fotsiny isika fa noho ny asan'ny fanahy masina dia miditra tanteraka amin'izany herinandro masina izany ka miaina tanteraka izay . Maninteraka amin'ny fiainantsika izany ka hahatonga antsika hitoetra bebe kokoa amin'i Jesoa sy itoerany bebe kokoa ao amintsika mba hamokatra ny fiainantsika. Izany no dikan'ny Paka : hamokatra aim-baovao entitsika amin'ny fiainana andavanandro na dia eo aza ny adim-piainana sy fahasahiranana satria efa nandresy i Kristy araka ny hira ataontsika ny asabotsy masina.

Ireo vakiteny arosan'ny Eglizy androany dia tsara ho dinihintsika tsara fa làlam-pamonjena ho antsika izay azo lazaina fa zavatra anankiroa no ankalazaintsika amin'izao Alahady sampankazo izao dia ny fidiran'i Jesoa Kristy ao Jerosalema izay mampiditra azy amin'ny fijaliana. Sady mankalaza, mihoby isika no mandinika ny fijaliany.

Zavatra roa toa mifanohitra tokoa no ankalazaintsika satria tamin'ny fidiran'i Jesoa ao Jerosalema dia fifaliana, fihobiana, firavoravoana no nandraisan'ny olona tao Jerosalema azy, nihoby ny olona rehetra nanao hoe " Hozana, hozana hosoavina anie ny fanjakan'i davida". Izany tokoa no azo lazaina fa tandindon'ny fiainantsika satria matetika isika izay mihoby ihany, isika izay manao hozana no matetika miova ka miantsoantso araky ny henontsika ao amin'ny evanjely hoe "fantsio, fansio amin'ny hazo fijaliana". Izany no mampibaribary fa mivadibadika ny fiainantsika olombelona fa Andriamanitra kosa tsy miova àry izany no tian'ny Eglizy ho tsapantsika amin'izao fidirana amin'ny herinandro masina izao : isika mety miovaova ny fomba fijerintsika ary na ny fiainantsika aza mivadibadika noho isika mpanota fa Andriamanitra tsy mivadika amin'ny fitiavany izy. Aoka ary ho fampianarana ho antsika ireo vakiteny renensintsika androany ity.

Tsara ho tsapantsika koa amin' ny evanjely androany izay mitantara ny fijalian'i Jesoa araky ny nanoratan'i Md Marka azy ny tenin'ilay kapiteny hoe : "Tena zanak'Andriamanitra tokoa io lehilahy io" rehefa nibanjina an'i Jesoa izy. Azo lazaina fa fiekem-pinoana lehibe izany ka anjarantsika no manao ny dingana hifikirantsika bebe kokoa sy hitoerantsika amin'i Jesoa. Ny sasany kosa nanesa sy

nanenjika an'i Jesoa ary nankahala azy aza, I Jesoa anefa tsy niontsona tamin'izany fa nanolotra ny ainy àry fampianarana lehibe ho antsika izany na dia maro ireo mpaneso sy mpanenjika antsika eo amin'ny fiainana ary indrindra mety poretin'ny fiainana isika ka mety ho tratran'ny fakam-panahy tahaka ny nanjo an'ireo ao amin'ny evanjely ka mandao an'i Jesoa. Fantaro fa i Jesoa tsy miova omaly sy anio, rahampitso ary mandrakizay, tsy miova ny fitiavany antsika. Izany no banjinintsika amin'ity herinandro masina hidirantsika ity ary manampy antsika ny Eglizy raha manolotra ny vakiteny fijalian'i Jesoa dieny izao Alahady sampankazo izao.

Ny fibanjinana ny fijalian'i Jesoa Kristy izay midika FITIAVANA dia mampahatsiahy ireo toetra dimy hahatonga antsika ho mpanorina Eglizy Olona Velona satria izany no ezaka ataontsika amin'ny fiomanana ny filan-kevitra eto amin'ny diosezy.

Ilaintsika izany toe-panahy dimy hitantsika amin'ny fibanjinantsika an'i Jesoa mijaly satria izany no tsy maintsy làlana hanorenantsika ny Eglizy Olona Velona sy hahatonga antsika ho taranaka mpanorina. Ny fijalian'i Jesoa Kristy dia nanorina antsika ho be fitiavana sy hiaina tahaka azy amin'ny ny maha Kristianina mpanara-dia an'i Kristy antsika. Raha mibanjina ny fijalian'i Jesoa isika dia ho hitantsika ireo toe-panahy dimy iezahantsika hiainana koa.

Ny FAHAFOIZANA izay mibaribary tanteraka amin'ny fijalian'i Jesoa satria nahafoy sy nanolotra ny ainy izy. Izany koa no làlana hahafahantsika manorina ny Eglizy Olona Velona,

Ny FAHASAHIANA hitantsika ao amin'i Jesoa koa izany. Tsy misy tahotra izy, tsy navozo, tsy misy zavatra nampatahotra azy fa nijoro ho zanak'Andriamanitra Izy izay no nanaitra an'ilay kapiteny na dia teo aza ireo zavatra maro manodidina dia ny fahasahiany no mibaribary amin'ny hazo fijaliana io,

Ny FITIAVAM-BAVAKA, tsy nisaraka tamin'Andriamanitra Ray i Jesoa fa nivavaka izy teo amin'ny hazo fijaliana,

Ny FANDRAISANA AN-TANANA sy FAHARETANA izay hita nibaribary tokoa raha nanaiky nanolotra ny ainy ho vonoina teo amin'ny hazo fijaliana izy ho famonjena antsika, nanana faharetana izy tamin'ny fijaliana, ny kapoka, ny ratra, ny fanesoana nanjo azy tsy niontsona izy,

NY FANENTRENTENA, tena feno fanentrentena i Jesoa, mibaribary izany amin'ny fijaliany raha nanaiky ho faty izy, nanaiky ho vonoina *“Natolotra tamin'ny mpikapoka ahy ny lamosiko; ary tamin'ireo nanongotra ny volombavako, ny takolako; ary ny tavako tsy nafeniko tamin'ny latsa sy ny rora. Fa ny Tompo Andriamanitra namonjy ahy, ka ny latsa tsy nahaketraka ahy; ka ny tavako nataoko manahaka ny afo vato ary fantatro fa tsy ho menatra aho»*.

Hararaotintsika izao herinandro masina izao hidirantsika bebe kokoa amin'izany làlana fanorenana Eglizy Olona Velona ka ny làlana natoron'i Jesoa no tsy maintsy ho làlana

hizorantsika ihany koa eo amin'ny fanorenana ny EOJ ary indrindra ianareo tanora amin'izao niany andro fankalazana ny JMJ. Raha te ho Génération des bâtisseurs ianareo tanora io lalana natoron'i Jesoa no lalana fa tsy izay atolotr'izao tontolo mitondra amin'ny fanapotehena.

Raha mibanjina ny fijalian'i Jesoa isika dia mahita fa mbola mijaly i Jesoa ankehitriny amin'izao andro iainantsika izao vokatry ireo fanilikilihina, amin'ny alalan'ireo izay miaina tanteraka anatin'ny fitapitaka sy ny risoriso ka izay indrindra no mahatonga antsika tsy maintsy miady miaraka aminy amin'izao fidirantsika amin'ny herinandro masina izao. Aoka isika hahatsiaro ireo voahilikikika, ireo izay hankahalaina sy ireo izay potehina. Aoka isika ho vonona koa hiady miaraka amin'izy ireo, izay no mampiombona antsika amin'ny fijalian'i Jesoa.

Ny vakiteny faharoa rahateo ny taratasin'i Md Paoly dia mampianatra antsika hanana ny fanentrentena nanan'i Jesoa, *“Na dia tao amin'ny fomban'Andriamanitra aza i Kristy, dia tsy nihevitra ny fitoviany saranga amin'Andriamanitra ho zavatra nobaboiny, fa nialany izany tamin'izy naka ny fomban'ny mpanompo, ka tonga mitovy amin'ny olombelona, sy hita ho olombelona tamin'ny fisehoany rehetra, ary nilatsa-Tenany ho ambany, hanaiky hatramin'ny fahafatesana, dia fahafatesana tamin'ny Hazo fijaliana”*. Izany no lalana nofidin'i Jesoa ary mampianatra antsika izy. Izany no lalana hazahoantsika ny famonjena.

Manana modely nivelona an'izany isika dia i Lucien Botovasoa izay ambara ho olontsambatra tsy ho ela ka enga anie isika haka tahaka azy koa eo amin'ny fiainantsika andavanandro fa indrindra ianareo tanora satria tanora tahaka anareo i Lucien Botovasoa.

Aoka isika hahay hananararaotra izao fotoana izao mba hiombonantsika bebe kokoa amin'i Jesoa, raha miara-maty amin'i Jesoa amin'ny ratsy rehetra isika dia hiaraka hitsangana aminy koa.

Ry Jesoa Kristy zokinay ô, nanaiky ny ho faty teo amin'ny hazo fijaliana ianao, nanaiky ho faty ho anay, mankasitraka sy mankatelina anao izahay,

Ampianaro izahay hitoetra tanteraka ao aminao ary ianao hitoetra ao aminay na inon-kidona na inon-kiatra ka ho vonona tanteraka izahay hanatanteraka ny sitraponao izay nanaiky ho vonoina ho famonjena anay, enga anie izahay hiombona aminao tanteraka, hamporisiho izahay hanaraka anao tsara amin'ity herinandro lehibe herinandro masina ity, omeo hery izahay tsy hisaraka aminao ka hiaraka aminao hatramin'ny farany, enga anie izahay hifankatia tokoa satria izany no ambaran'ny fijalianao sy ampianarinao anay. Amen

Mompera Arseveka Mgr Benjamin Ramaroson